

## REGIONAL NEWS

HEADLINES:-

1. Agnipath Scheme hnuiaia sipai a tang tur, Assam Rifles Aizawl Battalion hnuiaia training zinga mi 13 te chu Agniveer turin an tling.
2. Champhaiah International Mizoram Trade Expo vawi 1-na vawiin khan hawn a ni.
3. Prime Minister Narendra Modia chuan vawiin khan International Conference for Agricultural Economist vawi 32-na New Delhi-ah a hawng.
4. Paris Olympic neih mekah India thalkahthiam Dipika Kumari chuan hmeichhe Archery intihsiakah Quaterfinal a lut.

&lt;&gt;&lt;&gt;&lt;&gt;

AGNIPATH

Thalaite India sipai a an luh theihnana Sorkar laipuiin a duan, Agnipath Scheme hnuiaia sipai a tang tur, Mizo thalai tling tharte chu nimin khan Assam Rifles buatsaihin chawimawi an ni.

Assam Rifles Aizawl Battalion te chuan Mizo thalai sipai tang duh te tan an inzir lawkna hun, physical leh written exam Pre-Recruitment Training chu kumin February ni 25 atanga May ni 5 chhung khan a buatsaih a, Physical training ah hian zirlai 86 tel in, mi 13 te chu Agnipath scheme hnuiaia sipai, Agniveer ni thei turin an tling a ni.

Aizawla buatsaih tling tharte lawmpuina hun ah hian Lt. Col. Nikhil Prakash, 2nd in Command chuan Agniveer te chu ram tana theihtawp chhuah a, in vawng tlat turin a chah a, Assam Rifles chu zirlai hma hun eng tak nei, sum leh paia harsa leh kaihhruai ngai te tan englai pawhin training pe turin an in hawng reng tih sawiin, sipai mai piah lamah exam hrang hrang hmachhawn tur tan a thlawn vek in zirtirna an pe thei a, zirlai a duh apiang tan Pre Training turin an pan theih mek tih a sawi bawk a, zirlai hlawhtlinna chang te chuan Assam Rifles ten an puihna zawng zawng ah lawmthu an sawi bawk a ni.

&lt;&gt;&lt;&gt;&lt;&gt;

MBCC

Mizoram Business Coordination Committee (MBCC) chuan tun hnai hian Mizoram chhungah dan loa sumdawng an tam tih an sawi.

MBCC thuchhuah tarlan dan chuan, Mizo hming hawha hnam dang dawr leh Mizo hminga hnam dang Motor register awm zawng zawngte MBCC chu dan anga hrem an nih theih nan hmalak an tum a, dawr siam nan leh motor register nana Mizo hming hman tir zawng zawngte a rang thei angbera Mizo hming an hman tir te titawp nghal turin MBCC chuan an ngen a, hetiang Mizo hming hmanga hnam dang dawr leh motor register titawp lote chungah ACTION lak a awm chuan mahni hnam hralha mahni hming hnam dang hman tirtute mawh a ni ang tih hre turin MBCC chuan aan ngen bawk a ni.

MBCC chuan Mizorama sumdawngten Income Tax atangin Income Tax pe tura tihna lehkha leh adangte dawng engemaw zat an awm tih an sawi a, hemi chung changah hian Income Tax lama thawktute leh Dan hremite nen zirchianna zau zawk buatsaih tura hmalak an lak mek thi sawiin tumah lo chia lo turin leh hetiang lama harsatna neite chuan MBCC hruaitute hrilh hre nghal vat thin turin an inngen a ni.

&lt;&gt;&lt;&gt;&lt;&gt;

MAMIT

Mamit atanga Aizawl panna kawngpui National Highway 108 (NH 44A tih bawk) chu Dampui leh Dapchhuah inkarah nimin tlai khan lirthei engchi mah kaltlang theih lohvin leimin in a hnawh a, vawiin chhun khan lirthei te chi kaltlang theih tur a tih tlang a ni.

National Highway 108 leimin avangin a ping anih tih hriat anih veleh kawng enkawltu PWD Highway division 1 te chuan thenfai hna an SDO Pu Lalrohluva hovin ngawrh takin an thawk nghal a, leiminna lai hmun hi leitan anih avangin duh angin hna a thawh chak theih lova, vawiin chhun khan lirthei te chi (LMV) kaltlang theih tur a siam a ni a, ruah a sur lohva lei a min belh loh chuan lirthei eng chi pawh kaltlang thei tur a thenfai vat an inbeisei a ni.

Hetih lai hian ruahsur nasat chuan kawng chung hi min hlauhawm ala ni tih kan corr chuan a sawi a ni.

&lt;&gt;&lt;&gt;&lt;&gt;

### CHAMPHAI TRADE EXPO

Champhai District Addl. D.C., Pu K. Zorammuana chuan Zorun Events te buatsaih International Mizoram Trade Expo vawi 1-na chu Vanlallawma Indoor Stadium (VANIS), Champhai Kahrawtah vawiin khan a hawng.

Thu sawiin, Pu K. Zorammuana chuan Trade Expo chu sumdawna kawnga ngaihtuahna thar siamtu, Mizo sumdawngte leh hnamdangte inkara inlaichinna tha siamtu ni se a duh thu a sawi a. Mizoram awmna chu hmun pawimawh tak, Myanmar leh Bangladesh ramri ten an hual vel a nih avangin Kaladan Multi-Modal Transport Transit Project (KMMTP) a puitlin hunah phei chuan khawmual leh tuipui kaltlangin Asia chhim chhak ram te leh Bangladesh tan India ram kawtchhuah a la ni thuai dawn a, he hun atan hian tun atanga inpuahchahna kalpui a ngai a ni, a ti.

1st International Mizoram Trade Expo hi August ni 5 atanga August 24 thlengin Vanlallawma Indoor Stadium (VANIS) Ground Floor-ah neih a ni dawn a. Expo-ah hian ramchhung leh pawn atangin sumdawng engemaw zat an kal khawm a, Nitin zinglam dar 10:00 atanga zan dar 08:00 thleng mipuite tlawh theiha hawn thin a ni ang.

<><><>

### CHAMPHAI POLICE

Nizan hmasa, August ni 1 zan dar 7:25 vel khan Champhai Police Station chuan Champhai khawpui chhunga mi pakhat hnen atangin an chenna ina inawhhlum tum an awm thu report an dawng a. Inawhhlum tum hi a taksa a la lum tih sawiin, report an dawn veleh SI C.Lalsangliana leh a team-te chu rang takin an kal a. Inawhhlum tum hi thutthlengsei-ah muin Police-te hian an enfiah nghal a, a marphu a la awm avangin a damchhuah leh theihna turin Police-te hian Damdawi In an panpui nghal a, rang taka enkawl na pek a nih hnuah a dam chhuak leh ta a ni.

Champhai District S.P. Pu Vineet Kumar chuan thuchhuah siamin nunna hlu tak chhanchhuaktu, Champhai Police Station team-te a chhuang hle tih a sawi a, Champhai Police Station team-te rang taka che chhuaka, a hun taka hma an lakna zarah nunna hlu tak chhanchhuah a ni a ti a, Champhai Police Station Team te chu a chhuan thu a sawi a ni.

<><><>

### WOMEN & CHILD DEVELOPMENT

Women & Child Development hmalaknain Thenzawl Common Poshan Vatika – ah ‘Ek Ped Maa Ke Naam’ and Plant4Mother’ hun hman a ni a, thingphun runpui neih a ni.

Women & Child Development Director Pi Zoramthangi Chhangte chuan thing chu boruak tha petu mai bakah khawlum chho zel venna atana pawimawh ber a nih thu a sawi a. Thing leh mau te chu leilung luang ral tur veng tu, khuarel chhiatna tam tak laka min vengtu, mihringte kan dam khawchhuah theihna tura pawimawh tak a nih thu sawiin thingphun uar zel tur leh thingphun pawimawhna te hre thar turin kalkhawmte a chah a ni.

Thingphun hnatlangah hian Serchhip District Programme Office leh Serchhip ICDS Project, Thenzawl Forest Division thawktute bakah Thenzawl khuaa Anganwadi Worker leh Helper te an tel a, thing tiak 60 chuang an phun a ni.

‘Ek Ped Maa Ke Naam and Plant4Mother’ hnuai a thing phun runpui hi July ni 22 khan Women and Child Development Minister Pi Lalrinpui’n Sakawrhmutuaitlang, Sihphir - ah a lo hawng tawha, Environment Forest & Climate Change Department te nen thawk hoin thing tiak 50 chuang an phun tawh a ni.

<><><>

### BCM

Lungleia Lunglawn Baptist Church of Mizoram chuan zing tawngtai inkhawm an neih kum 60 tlinna pualin tukin khan hun an hman a, Mizorama zing tawngtai inkhawm nei hmasa ber an ni.

Tukina zing tawngtai inkhawm ah Kohhran chairman elect Upa Ngurmuana kaihhruaiin Biak in tualah hman niin he hunah hian bialtu Pastor Rev.Sangliankhuma Chinzah chuan Juilee puala monument siam a hawng a, Kohhran committee member te leh fellowship tina office bearer ten Jubilee dar an vuak a ni. Hun hnihna Upa R.Kaptluanga Kohhran chairman kaihhruaina in Biak in chhungah lawmthu sawina inkhawm tawi buatsaih a ni.

Kohhran secretary Upa K.Lalchamliaana tarlan danin, Kum 1964 a World Vision in All India Pastor Conference, Guwahati-a a buatsaih ah Lunglawn Kohhran atangin mi 3- Upa Sâpkûnga, Tv. Vânlalliana (martar), Tv. Rokhama te an tel ve a .He hunah hian South Korea atanga kal Dr. Samuel Moffatchuan S. Korea Kohhran a harh a, a nun a, Missionary thahnem tâwk tak an tirh chhuah theih chhan ber nia a sawi, tûk tina khawpui dâia

ṭawngṭaina tlânga mi tam tak zîng dar 4:30-a an ṭawngṭai mup mupna rah a nih thu a sawi chuan Tv. Vânlalliana (Martar) thinlung a khawih nasa hle a, Mizorama la tih ve ngei chu a rilruah a riak lian ta hle a ni. Bul tan pui turin Tv. Ch.Siamthanga, Tv. R. Thangruala te leh a remchang thei apiangte chu a sâwm a, August 3, 1964 ah zing tawngṭai inkhawm chu tan a ni a, hemi tuk hian Tv. Vanlalliana hi zing dar 4:30 ah laltin khaiin Biak in chhungah a thu a, kum 1972 atangin Kohhranin hma a la chho ta a ni.

BCM Lunglawn Kohhranah hian Covid-19 hri len lai tih loah chuan kum 1964 atangin zantin inkhawm an nei ziah thin a ni.

<><><>

#### AGRICULTURE ECONOMIST CONFERENCE

Prime Minister Narendra Modia chuan vawiin khan International Conference fo Agricultural Economist vawi 32-na New Delhi-ah a hawng. Thusawiin PM Modia chuan India chu buh leh bal thar chhuak hmem ram anih thu sawiin khawvel puma khamkhawp ei tur hmu tam lutuk ti tlem turin theihtawp a chhuah a ni a ti.

Pu Modia chuan sawrkarin agriculture sector ti changtlung turin insiamthatna leh hmalakna chi hrang hrang a kalpui a, loneitute dinhmun chawikan chu an tum ber a ni a ti a. Chemical tel lo thlai thianghlim thar chhuah natural farming an ti lar chho zel tih sawiin Union Budget 2024-25 ah pawh sustainable agriculture atan sum tam tak ruahman a ni a ti a. Sik leh sa inthlak mil tur thlai chi sang khat leh 900 chuang kum 10 kalta chhungin a sem tih a sawi a. Technology te tangkai taka hman anih thu sawiin loneitu vaibelchhe 10 chuangte account ah PM Kisan Samman Nidhi kaltingin sum tam tak thun a ni tawh a ti baw k ni.

He hunah hian Union Agriculture Minister Shivraj Singh Chouhan pawhin thu sawiin Prime Minister Narendra Modia kaihhruaina hnuaiyah agriculture a thang nasa tih a sawi a. Khawvela chaw eitur tlachham leh taksa khamkhawp chaw tha ei pha lo tam lutuk chu tih tlem a tul a tih thu a sawi baw k a ni.

<><><>

#### PARIS OLYMPIC

Paris Olympic neih mekah thalkahthiam Dipika Kumari chuan hmeichhe Archery intihsiakah Quaterfinal a lut a. Vawiin khan Dutch archer Quinty Roeffen a hneh a ni.

Hetihlai hian 25m air pistol inelnaah India nula Manu Bhaker chuan medal hlawh chhuak zo loin palina a ni.

Mipa boxing kg 71 category quarterfinal ah Nishant Dev chuan Mexican Marco Alonso Verde chu zaninah a tum dawn a. A chak anih chuan India tan medal pakhat a hlawhchhuak thei dawn a ni.

<><><>

#### INSURANCE FOR LANDSLIDE VICTIM

Sawrkar laipui chuan Kerala leimin tuarte theihtawpa lo pui turin Public Sector Insurance Company te a hriattir. Union Finance Ministry chuan leimin tuarte hian an insurance dil mek te chak taka an hmuh theih nan insurance company te theihtawp lo chhuah turin a ti a. LIC te chu PM Jeevan Jyoti Bima Yojana policy hmangtute hnenah an sum dawn theihte rang taka pe chhuak turin a ti a. Rang taka sum an hmuh theih nan lehkha kal velah pawh ngaihnathiam an ni ang a ti baw k. General Insurance Council chuan insurance claim ten an hmuh thuai theih nan hian insurance company te hi uluk zawkin an vil a. Sawrkar laipui chuan leimin tuarte a tawrhpuu thu sawi nawn lehin chhawmdawlina an hmuh turte tlai khawmuang lova an hmuh thuai theih nan theihtawp a chhuah zel a ni a ti.

<><><>